

## PHILIPPS, Syr JOHN (1666? - 1737), diwygiwr crefyddol, addysgol, a moesol

**Enw:** John Philipps  
**Dyddiad geni:** 1666?  
**Dyddiad marw:** 1737  
**Priod:** Mary Philipps (née Smith)  
**Plentyn:** Richard Philipps  
**Plentyn:** John Philipps  
**Plentyn:** Erasmus Philipps  
**Rhiant:** Catherine Philipps (née Darcy)  
**Rhiant:** Erasmus Philipps  
**Rhyw:** Gwryw  
**Galwedigaeth:** diwygiwr crefyddol, addysgol, a moesol  
**Maes gweithgaredd:** Crefydd; Addysg; Gwleidyddiaeth a Mudiadau Gwleidyddol  
**Awdur:** Mary Clement

Mab [Syr Erasmus Philipps](#) a'i ail wraig Catherine Darcy, (bu hi farw 15 Tachwedd 1713) merch Edward Darcy o'i wraig Elisabeth, ferch Philip Stanhope, iarll 1af Chesterfield. Ni wyddys ymha flwyddyn y ganwyd ef. Yn ôl yr arysgrif ar ei gofadail yn eglwys Fair, Hwlfordd, bu farw ' January 5, 1736/7 in the 77th year of his age.' Awgryma hyn 1660, eithr ni all hynny fod yn gywir gan mai ar 1 Medi 1660 y priododd ei dad ei ail wraig ac mai ail blentyn yr ail briodas oedd John Philipps. Aeth i Ysgol Westminster fel ' Ysgolor y Brenin ' yn 1679; gan mai tua 13 a fyddai oed bechgyn yn cychwyn yn yr ysgol hon fel rheol, ymddengys ei eni c. 1666. Yr oedd yng Ngholeg y Drindod, Caergrawnt, o 1682 hyd 1684, ac fe'i derbyniwyd i Lincoln's Inn ar 21 Ionawr 1683/4. Ni cheir ei enw yng nghofrestrau yr un o'r sefydliadau uchod nac yng nghofrestr Ty'r Cyffredin. Gadawodd Gaergrawnt heb raddio ac ni ddaeth yn fargyfreithiwr. Y mae llythyr ato gan ei dad pan oedd yng Nghaergrawnt yn awgrymu ei fod yn wastraffus ei dreuliau ac yn ei rybuddio i beidio a chael rhagor o ' foolish frolics ' (N.L.W. Picton Castle MSS., 30 Ebrill 1683).

Ychydig a wyddys am ei yrfa hyd 1695. Ym mis Rhagfyr y flwyddyn honno etholwyd ef yn aelod seneddol dros fwrdeisdref Penfro; daliodd y sedd hyd 1702. Ailetholwyd ef i'r Senedd, a bu'n aelod dros Hwlfordd hyd 1722. Bu ei dad farw 18 Ionawr 1696/7. Ar 12 Rhagfyr priododd y mab, a oedd bellach yn Syr John Philipps, y 4ydd barwnig, â Mary, merch ac aeres Anthony Smith, marsiandwr East India cyfoethog; bu Lady Philipps farw 18 Tachwedd 1722, gan adael tri mab a thair merch. O 1695 hyd 1737 yr oedd Syr John yn ffigur blaenllaw yn holl fudiadau crefyddol a dyngarol ei ddydd - y ' Society for the Reformation of Manners,' y S.P.C.K., y S.P.G., yr ' East India Mission,' a'r ' Holy Club.' Yr oedd mewn cyswllt cyson â diwygwyr crefyddol megis A. H. Francke, A. W. Boehme, J. F. Osterwald, John a Charles Wesley, a George Whitefield, gwr y bu Syr John yn ei gynnal yn Rhydychen am gyfnod. Etholwyd ef yn aelod o'r S.P.C.K. ymhen mis o'r amser y ffurfiwyd y gymdeithas

honno, ac efe oedd ei haelod mwyaf dylanwadol hyd adeg ei farw. Gwnaeth siroedd Penfro a Chaerfyrddin yn ganolfannau pennaf gwaith y gymdeithas yng Nghymru, sefydlodd 22 o ysgolion yn Sir Benfro ac amryw yn y sir arall, ac efe a fu'n gyfrifol gan mwyaf am lwyddiant ymdrechion cynharaf ei frawd-yng-nghyfraith, [Griffith Jones](#), Llanddowror.

## Awdur

Dr Mary Clement

## Ffynonellau

Cofrestrï Ysgol Westminster; Coleg y Drindod, Caergrawnt; Lincoln's Inn

*Llawysgrifau'r S.P.C.K.*

Cofnodion yr S.P.G.

*Llawysgrifau Castell Pictwn yn Llyfrgell Genedlaethol Cymru* yn Ll.G.C.

Luke Tyerman, *The life of the Rev. George Whitefield, B.A., of Pembroke College, Oxford* (London 1876-77)

Luke Tyerman, *The Oxford Methodists: memoirs of the Rev. Messrs. Clayton, Ingham, Gambold, Hervey and Broughton, with biographical notices of others* (Llundain 1873)

Thomas Shankland, 'The Charity School Movement in Wales,' yn *Trafodion Anrhydeddus Gymdeithas y Cymmrodorion*, 1904-5

Thomas Shankland, 'Diwygwyr Cymru yn *Seren Gomer*, 1901-3

J. J. Evans, *Cymry Enwog y Ddeunawfed Ganrif* (Aberystwyth 1937)

M. G. Jones, *The charity school movement a study of eighteenth century puritanism in action* (1938)

W. M. Williams, 'The Friends of Griffith Jones, yn *Y Cymmrodor*, 1939

D. Salmon, 'The Good Sir John Philipps,' yn *The Western Telegraph*, 29 Mai 1941

Mary Clement, *Correspondence and minutes of the S.P.C.K. relating to Wales 1699-1740* (University of Wales Press 1952)  
*The S.P.C.K. and Wales, 1699-1740* (S.P.C.K. 1954)

T. Kelly, *Griffith Jones, Llanddowror pioneer in adult education* (Cardiff 1950)

## Dolenni Ychwanegol

Wikidata: [Q16859478](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

